

畏庐曰：贪人无厌，终其身均沉影水中也。

一七 犊车过狭巷

犊车过狭巷而陷其辙，御者惶急，目其车而呼神。神闻号而至，戒之曰：“肩而轴，鞭而牛，车脱险矣，焉待呼我？而惟致力于能尽之地，始大有验。憚其劳而哀我，何益？”嗟夫！人惟自求助可尔，待人而为，虽神犹不为庇，而况人耶？编者按：参见《意拾喻言》第五七则、《海国妙喻》第四〇则。

一八 盲鼯

鼯生而盲，一日告其母，自诩能视。母鼯欲证其不能视之实，乃取檀香之屑，陈其前，问之。鼯曰：“石也。”母鼯叹曰：“尔盲其目，且并盲其鼻。”

畏庐曰：以新学之明，证旧学之暗，自知为暗，则可以向明，若居暗而侈明，未有不为一鼯者。

一九 牧人亡犊

有牧于丛蔚之地，而亡其犊，四调莫得。祝曰：“神孰能知吾犊所在？请杀羔酬神。”一日跨小阜，见巨狮方噬其犊，牧者大恐，更祝神曰：“吾向言得犊酬羊，今求犊得狮，将并亡吾身。神更庇我者，吾当不爱吾犊，且杀犊祀神矣。”

畏庐曰：牧者以犊为命，至忍杀犊，怵于祸也。呜呼！天下爱命